

# Mesyuarat tergepang bincang isu cuaca panas

**KUALA LUMPUR 14 Mac** - Satu mesyuarat tergepang bagi membincangkan keadaan cuaca panas yang melanda negara ketika ini akan diadakan dalam masa terdekat di Kementerian Sumber Asli dan Alam Sekitar sebelum dibawa isu ke Kabinet pada Jumaat ini.

Menterinya, Datuk Seri Wan Junaidi Tuanku Jaafar berkata, mesyuarat berkenaan akan memfokuskan kepada perbincangan mencari langkah yang perlu diambil bagi mengatasi masalah tersebut.

Menurut beliau, isu tersebut bukan sesuatu yang boleh dipandang ringan kerana fenomena itu bukan bersifat sementara kerana boleh berulang pada tahun akan datang.

“Kita menerima hakikat bahawa isu cuaca panas ini bukan satu perkara kecil kerana fenomena tersebut kerap kali berlaku.

“Kementerian akan mengadakan satu mesyuarat tergepang bersama Kementerian Pendidikan, Kementerian Tenaga, Teknologi Hijau dan Air, Kementerian Sains, Teknologi dan Inovasi, Kementerian Kesihatan serta berkaitan seperti Jabatan Meteorologi dan Jabatan Alam Sekitar bagi membincangkan perkara ini,” katanya di lobi Parlimen di sini hari ini.

Sementara itu, Menteri Sains, Teknologi dan Inovasi, Datuk Seri Madius Tangau berkata, warga emas, kanak-kanak dan mereka yang sensitif terhadap cuaca panas perlu lebih berjaga-jaga dan disarankan supaya minum lebih



**WAN JUNAIDI**



**MADIUS TANGAU**



**AHMAD SHABERY**



**P. KAMALANATHAN**



**S. SUBRAMANIAM**

banyak air dalam tempoh ini.

Katanya, langkah-langkah pencegahan itu perlu diambil berikutan fenomena El Nino yang sedang melanda beberapa negeri di utara Semenanjung, Sabah dan Timur Sarawak.

“Sehingga semalam, suhu tertinggi dicatatkan adalah 38.5 darjah Celsius di Alor Setar, Kedah dan Chuping, Perlis. Untuk makluman, suhu tertinggi yang pernah direkodkan di negara ini adalah 40 darjah Celsius di Chuping, Perlis pada 1998.

“Keadaan cuaca panas ini boleh mencetuskan fenomena gelombang haba iaitu situasi yang membawa risiko kesihatan hipertermia atau strok haba,” katanya.

Sementara itu, Menteri Pertanian dan Industri Asas Tani, Datuk Seri Ahmad Shabery Cheek berkata, pihaknya merangka pelan strategik sebagai persediaan awal menghadapi kemungkinan cuaca panas yang berpanjangan atau El-Nino.

Menurutnya, pada peringkat awal, kementerian itu mengedarkan pam air ke beberapa lokasi

strategik di seluruh negara.

“Cuaca panas ketika ini masih belum di tahap membimbangkan. Namun, kita bimbang sekiranya keadaan jerebu kembali, sudah pasti akan memburukkan lagi keadaan.

“Untuk itu, kita menyediakan satu pelan strategik yang merangkumi penyediaan pam-pam ke seluruh negara bagi membantu membekalkan air di kawasan-kawasan yang berkemungkinan terjejas akibat fenomena tersebut,” katanya.

Timbalan Menteri Pendidikan, Datuk P. Kamalanathan berkata, pihaknya menunggu laporan Kementerian Sains, Teknologi dan Inovasi berhubung fenomena cuaca panas terik, El Nino yang melanda negara.

Katanya, pihaknya telah berbincang dengan kementerian itu dan hanya menunggu cadangan dan ulasan berkenaan perkara tersebut kepada kementerian.

“Tindakan lanjut sama ada sesi persekolahan ditutup atau tidak hanya akan diambil setelah laporan dan cadangan daripada Ke-

menterian Sains, Teknologi dan Inovasi diterima.

“Sesi persekolahan perlu diganti sekiranya menerima notis bercuti, bagaimanapun jika diarahkan tutup sekolah tidak perlu diganti,” katanya.

Di **KLANG**, Kementerian Kesihatan, Datuk Seri Dr. S. Subramaniam menasihatkan supaya sekolah di seluruh negara mengurangkan aktiviti di luar bilik darjah ekoran keadaan cuaca panas yang melanda negara ketika ini.

Menurutnya, fenomena El Nino yang dijangka berterusan sepanjang bulan ini berisiko menyebabkan tubuh badan manusia kehilangan air.

“Meskipun setakat ini tiada peningkatan jumlah pesakit yang ketara akibat cuaca panas, tetapi langkah pencegahan perlu diambil dan pihaknya akan terus membuat pemantauan.

“Mungkin apa yang boleh dibuat ialah mengurangkan aktiviti di luar dan membenarkan pengajaran dan pembelajaran dijalankan di dalam kelas sahaja,” katanya.